



#### Gandingan Mantap UPM Holdings Dan Dato' Wah Idris Dalam 'Leadership Through Music'



Dato' Wah Idris dan Pengurus Besar UPM Holdings pada sidang akhbar di UPM.

**SERDANG, 27 Julai** – UPM Holdings akan bekerjasama dengan komposer dan pemuzik tersohor tanah air, Dato' Wah Idris dalam Bengkel 'Leadership Through Music' bagi meningkatkan daya kepimpinan dalam diri individu melalui penghayatan muzik.

Bengkel yang bertemakan 'Fun, Entertaining And Educational' akan diadakan pada 20 Ogos 2009 di Putrajaya International Convention Center (PICC) bagi meningkatkan keyakinan diri dalam aspek kepimpinan kepada peserta yang terdiri daripada pemimpin industri dan korporat serta kalangan pelajar.

Bengkel tersebut bakal menjadi platform penerapan ciri-ciri kepimpinan yang terdapat dalam muzik kepada kumpulan sasaran seperti badan korporat, agensi kerajaan dan swasta serta semua organisasi.

Pengurus Besar UPM Holdings, Ramlan Osman berkata bengkel seumpama itu mendukung agenda yang sangat penting untuk menerapkan ciri-ciri kepimpinan melalui muzik yang berbentuk santai dan hiburan.

"Leadership Through Music merupakan program yang pertama seumpamanya di Malaysia. Kerjasama dengan Dato' Wah Idris merupakan satu kolaborasi hebat untuk menjayakan bengkel ini," katanya pada sidang akhbar di sini.

Beliau berkata bengkel itu turut memberi peluang kepada pelajar-pelajar mengasah aspek kepimpinan bermula dari awal.

Antara yang menarik dalam bengkel itu ialah penglibatan semua jenis alat muzik tradisional dan moden daripada pelbagai bangsa dan etnik.

Sementara itu, Dato' Wah berkata idea untuk membuat wacana tersebut tercetus dari keterujaannya untuk melihat penyatuan antara dunia muzik dengan dunia korporat, yang sememangnya mempunyai persamaan seperti kerjasama, penyatuan tenaga dan persefahaman yang akan dirungkai di sebalik intelektual muzik itu sendiri.

"Saya ingin berkongsi misteri dan kreativiti dalam muzik yang boleh diaplikasikan pada setiap aspek kehidupan organisasi termasuklah badan-badan korporat yang sentiasa menekankan aspek kepimpinan menerusi ciri-ciri yang terdapat dalam sesebuah muzik tersebut.

"Justeru, pada akhir bengkel ini saya akan runtkaikan keintelektualan muzik dan ciri-ciri kepimpinan, selidik-tidaknya dalam diri setiap peserta untuk kemajuan diri dan organisasi melalui kehebatan dalam metafora muzik," katanya.

'Leadership Through Music' mensasarkan 100 hingga 120 peserta yang akan terlibat dalam bengkel ini yang terdiri daripada pelajar, pengurus dan pengarah organisasi tempatan dan antarabangsa.



Dato' Wah Idris sedang menjawab soalan dari media.

Disediakan oleh Seksyen Media dan Publisiti Bahagian Komunikasi Korporat UPM